

La lenghe furlane protagoniste di un video de UE

In ocasion de Zornade Internazionâl de Lenghe Mari il zovin infermîr Raffaele Puppo al à fevelât di cemût che al dopre il furlan in corsie

La diversitât linguistiche e à un grant valôr, ancje sociâl. I operadôrs sanitaris di tantis minorancis linguistichis lu trasmetin ben doprant ogni dì la lôr lenghe mari sul lavôr e cui pazients. Chest al è il messaç dal video promovût dal Network to Promote Linguistic Diversity (NPLD), pe Zornade Internazionâl de Lenghe Mari, istituide de Unesco tal 1999 e che si celebre ai 21 di Fevrâr.

Il Network – che al tutele e al promôf lis lenghis minoritariis e regjonâls di dute la Europe e che al colabore cu la Union Europeane – al à domandât ai siei afiliâts di realizâ un video dulà che un operadôr al da la sô testimoniance. La ARLeF e à sielzût Raffaele Puppo, infermîr intal repart di Medisine dal Ospedâl di San Denêl. Il zovin dal Friûl culinâr, che al à 28 agns, al conte di trop impuartant che al è par lui fevelâ in lenghe furlane cui pazients, parcè che al jude a vê un rapuart plui prossim e a trasformâ l'ambient dal ospedâl, che al è dispès un pôc frêt e distacât, intun puest plui familiâr. La relazion cul pacient inte lenghe dal cûr e je un aspjet che Puppo al cognòs une vore ben, stant che al à fat ancje la tesi di laurea su chest argoment.

Il video dal NPLD al è a disposizion sui canâi de Union Europeane e si lu pues viodi ancje tal profil Facebook de ARLeF.

Zornade Internazionâl de Lenghe Mari

La Zornade Internazionâl de Lenghe Mari, che si celebre ai 21 di Fevrâr, e je stade istituide de UNESCO tal 1999 par promovi la diversitât linguistiche, culturâl e il plurilinguism. E je nassude par ricuardâ un fat di croniche grâf sucedût propit in chê zornade, tal 1952: cuatri students bengalês de Universitât di Dacca (e altris che si jerin zontâts dopo) a son stâts copâts de polizie di chel che in chê volte al jere il Pakistan orientâl, intant che a rivendicavin la ufficialitât de lôr lenghe, il bengali. Cheste ricorence e je une oportunitât par cognossi, ricognossi e valorizâ lis lenghis de nestre vite (a scuele o tal lavôr) e par rifleti su la ricjece dal plurilinguism.

Ai 20 di Fevrâr dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<